



## Rosenheimer Ausblicke: ein Gedicht

### Beitrag

#### Interessante Aus- und Einblicke

*Neili bin i mit mei'm rostign Karrn  
an Ludwigsplatz neigfahn.*

*Wia i des riesige Radl hob gsehgn,  
hob i ma denkt, i bi do net bled!  
I fahr mit'm Riesrad,  
weil's Fahrn damit vui leichta geht.*

*Des Aufpumpn vo mei'm Zwoaradl hob i eh so dick.  
Fürn Luftdruck im Riesrad san andare zuaständig.  
Da Motor vo mei'm Karrn ghört g'richt.  
Da Antrieb vom Riesrad is a Gedicht!*

*Da Vakehr nimmt oiwei mehra zua.  
Im Riesrad hob i mei Ruah.  
Wenn de Autos untn stinka und kracha,  
ko i im Riesrad bloß lacha.*

*Außadem ko ma drobn auf 24 m Höhenluft schnappa.  
Des geht unt net auf de gstingatn Strassn.  
Schlafa bei dera bärign Aussicht waar a Sünd.  
Do kriagt ma net mit, wo's oan oi's auskimmt.*

*Vo unt siehgt ma net auf d'Hausdächa nauf.  
Und dass's do diam san gmütliche Terrassn drauf.  
Do drobn kennan d'Leit in da Sunn schlaffa  
wia s' da Herrgott hot gschaffa.*

*Weil i hob supa guate Augn,  
ko i de Leit beim Kaffeetrinka in d'Tass eini schaugn.  
Vielleicht solltat i ganz fest winka,  
dass s' ma an Kaffee uma bringa.*

*I fürcht, dass i do ko lang wartn.  
Do hock i mi liaba in'n Riedergartn  
und hör de Vögl zua  
und pfleg mei selige Ruah.*

*Beim Herbstfest beim „AUF UND NIEDA IMMA WIEDA“  
werd i oiwei ans Riesrad am Ludwigsplatz denka,  
wenn i mei'n Hintan tua auf und nieda senka.*

**Gedicht und Bilder:** Marga Leingartner





Bayerisches Staatsministerium für  
Ernährung, Landwirtschaft, Forsten und Tourismus



## Kategorie

1. Allgemein

## Schlagworte

1. Gedicht
2. Herbstfest
3. Rosenheim